

Zeitschrift: L'ami du patois : trimestriel romand
Band: 14 (1986)
Heft: 54

Artikel: Chayeta dou 8 de jouin 1988
Autor: Dzojè dè Prilly
DOI: <https://doi.org/10.5169/seals-241586>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 13.03.2025

ETH-Bibliothek Zürich, E-Periodica, <https://www.e-periodica.ch>



DOU 8 DE JOUIN 1986

A pou pri ti lè pays dou mondo l'an lou fusé, navèta ou bin bonba. No, no j'an rin fôta dè to chin, kemin tsakon aportè chon mochi dè bou, por ètsoudâ nouthra bala tsoudère, i chabrè tyè mé a dre trint'è trè è lè nyolè chè chòvon a chô dè pouè.

Vo j'i yu, kan lè Grahya chayechnon, la pyodze chàbrè intche-li. Che chin irè bi dari no, dèvan in grêpechin chi Mollendruz. Du le kol in vouitin pê la porta dè la pâ dè la Vallée de Joux, on chè dèmandâvè ch'irè pâ malnitho

dè troupâ ha trantyilitâ è ha tan bala kotse. Adan po pâ fére Jè boura, no no chin infelâ ou vindâdze dè l'Abbaye po bère ouna tacha dè né è medyi on kroisan, dyuchto po boutchi chi piti krâ a l'échtoma. Nouthra tyéchère chè fè on dévè dè fére chè fon dè fatè porno payi la tornâye, no la rêmârthyin.

Bin chur ke no pyan pâ chobrâ inke, adon avui nouthron kar on bokon mafi, ma bin menâ pê Gérard, lè to bounamin ke no no chin léchi brinâ dè travè dè hou tan qalé patyi, avui lou mu dè pèrè è hou j'adzè ke chinton bon la bronda. Y fô achebin dre ke le piti kou dè byan n'irè pâ po rin din chi pyéji. Arouvâ a la chorche du Doubs, Marguerite chè voli fotre din lè bré dou bleu riyô, dè tsanthe no j'an pu la ratinyi è bère chè botoyè, chindà !

Du inke, a pyan pi dou lon dè chi tan galé lé de St Point, totèvi bin dzoyà no j'an betè le kap chu Pontarlier. Galéja vela, pâ dre, ma on chavi pâ biin tyin dzoua on'irè intrè chi konprècheu à ha fanfare. On piti vèro chu le pàdzo, trè piti toua è rè viya dè la pâ dè la choupa.

Lè a Villers-le-Lac ke no j'an pu goutâ a nouthra dyije, irè farmo bon, ma le kunyu l'arè rin richkâ dè m'èthyafâ lè j'èrtè in trejechin, irè rondyi d'ouna pâ pê Maryèta, dè l'ôtra pê Suzanne pu pèr dèvan pê la charvinta. Apri le goutâ kôtyè j'on chè chon infelâ on piti po tsanpâ le kâfé è lè j'ôtro chè chon infelâ din le mothi po n'a vijita.

Tinke-no rè lavi, in min dè dou, no no travin chu le lé di Brenets. Che chin irè galé dè chè léchi dzubyâ intrèmi dè hou velâdzo katyi din ha bala vèrdya dè prâ è dè j'adzè. Ti hou j'oji ke no fajan l'anâ dè pojâ por no. Hou grantè rotsè ke l'an yu pachâ on bin pye grô Doubs, pu di damè ke chè chon katyè è on'inkourâ ke la choutâ pèr dou kou din ha galéj'ivuè. Pu chi Saut du Doubs bin katyi ou mitin dè hou dzâ dè Franthe è dè Chuiche. Lè vè chat'arè ke nouthron batô no j'a inbarkâ po la rèmontâye, rèprindre nouthron kar è chè diridyi vè le kol des Roches.

Halte ! Douane, kô vo j'ithè, du yô vinyi dèvo, vo j'i ôtyè a dèthyarâ, vo j'ithè vouéro ? Trint'è trè ! On grô fori dou gabelou è lavi po Le Locle, Chaux-de-Fonds, Vue des Alpes è les Hauts Geneveys, yô no pyin fére la pyathe è medyi ouna pitita mouàcha. Du inke, no chin vuto a Lojena in pachin dou lon dou lé dè Noutsathi pu l'autoroute.

Tyinta bala dzornâye ! Dou chèlà, rintyè dutrè nyolè, di galéjè kotsè, ti grahyà, prâ dè dzouyo è d'amihyà, pâ on ke la fougâ din le kar pè rèchpè po chon vejìn. Dyu chi bèni !

Ma n'oubyâdè pâ, che ôtyè ne va pâ, ditè kemin le mèdzo vo j'a de : trintè trè !

Dzojè dè Prilly